



Las chantaduras ed ils chantadurs vid exercitar la chanzun cun il titel «Pleds, plaid, pleds – en tschertga dal senn».

MAD

## «Barbagiat» è il Pled rumantsch 2016

■ (rtr) Il Pled rumantsch da l'onn 2016 è barbagiat. In pled ch'exprima insatge che bleras personas han gi quest onn – en spezial era suenter votaziuns ed elecziuns. «Barbagiat» descriva il mal ch'ins ha suenter avair fatg memia bler sport, suenter ina notg cun memia bler alcohol, ma era pervia d'ina dischillusiun suenter avair pers – per exempel – ina votaziun u elecziun. Da las prest 250 propostas ch'il public ha inoltrà ha la giuria tschernì la proposta «barbagiat», inoltrada da *Janna Venzin* (11) da Curaglia. La giuria cun

*Augustin Beeli*, schurnalist anr, *Anna Alice Dazzi*, linguista RTR, *Dominique Dosch*, autura, *Gian Michael*, deputà e *Reto Thanei*, magister secundar, argumentescha sia schelta cun il fatg che bleras e blers han gi quest onn in barbagiat (per tudestg Muskelkater ubain Katzenjammer) suenter la votaziun davart il Parc Adula e l'elecziun dal nov president dals Stadis Unids da l'America. «Che quai è stà in grond tema sa mussa er en las propostas inoltradas: Il public ha inoltrà passa 30 propostas cun il pled

«Trump» e passa 10 cun «Adula». Impurtant per la giuria è era stà il fatg ch'il pled da l'onn è chapibel en tut ils tschintg idioms rumantschs. Cun ils pleds inoltrads ha ina classa rumantscha da la scola chantunala da Cuir cun scolaras da tut ils tschintg idioms scrit in text per ina chanzun. La musica ha il giuven cumpo-nist *Flavio Bundi* fatg. En chasa RTR a Cuir han lura da quai da 100 chantaduras e chantadurs exercità la chanzun cun il titel «Pleds, plaid, pleds – en tschertga dal senn».